

Commentari – ‘Ina buorsa da tetra pak’

Introducziun

Zambergiar cun rumians. Las pusseivladads ein vastas. Igl exempel da zambergiar ina buorsa ord in ‘tetra pak’ sa esser in pensum ord ina retscha da lecziuns davart quella tematica. Savens enconuschan ils affons gia autras caussas che san vegnir zambergiadas ord rumians. Ei vegn perquei proponiu d’integrar ell’instrucziun ideas da zambergiar dils affons. La tematica lai il spazi da schar explicar ils affons il pensum culs differents pass allas conscolaras ed als conscolars. En connex cull’instrucziun da lungatg vegn aschia igl aspect da declarar, dar instrucziuns e circumscrivere, risguardaus. Ei exista era la pusseivladad da schar formular a scret l’idea en fuorma digl exempel ‘Ina buorsa da tetra pak’, aschuntaus cun simplas skizzas. Co skizzar enzatgei en fuorma semplia e capeivla, sa plinavon vegnir introduciu e tractau ell’ura da dessegn.

Didactica/Metodica da leger

Il text sa vegnir legius en classa. Sco introducziun ella tematica sa la scolasta/il scolast dar in impuls entras rumians (sco in tetra pak vit) e las pusseivladads da trer a nez quels en fuorma creativa (zambergiar decoraziun, bischutaria etc.).

Il fegls da lavur ein concepì sco manual. Ei vegn proponiu da schar luvrar las scolaras ed ils scolars en lavur singula ni en lavur da partenari. La scolasta/il scolast ha sulettamein la funcziun da gidar e da sustener ils scolars tier malcapientschas e damondas.

Cuntinuaziun

Sco gia menziunau ell’introducziun eis ei era pusseivel d’aschuntar alla retscha da lecziuns la lavur cun ideas dils scolars.

Las lavurs creadas san senz’auter vegnir exponidas/vendidas a caschun d’in bazar. Il recav savess vegnir utilisaus per in camp ni in project caritativ.

Informaziuns supplementaras

Autur: Arno Camenisch

Idea: Anita Bühlmann

Fotografias: Arno Camenisch